

Mayornan di Rudy Croes ta respalda su candidatura



Den presencia di e doñonan di cas, Sr. Maiki Croes y Sra. Ada Croes, para patras, por mira e Director di DIARIO, Sr. Josy M. Mansur, hunto cu e mayornan di Rudy Croes, Sr. Panchico Croes y Doña Mimita Croes.

ORANJESTAD (AAN)
Na cas di Sr. Maiki Croes y su señora esposa, Ada, a tuma lugar un entrevista cu Don Pancho Croes, mayor di Rudy Croes.

E Director di DIARIO a acudi pa e entrevista, cu ta un condensacion di e respaldo cu e Mayornan di Rudy Croes ta dune awor cu el a dicidi di drenta den Política.

Don Francisco Croes, cariñosamente yama "Panchico" a bisa cu nan no a spera cu ningun otro di nan yunan lo a drenta politica despues cu

nan a sufrí di amargura, tristeza, dolor y pena cu nan yiu stima, Betico, awe difunto.

"Na aña 1977, un meyanochi nos a wordu ataca pa riot comando. Nan a drenta nos cas, buscando arma, pero nan no a haya ni un sambechi. Tabata un rato masha horrible cu nos a pasa aden ora cu un di e riot comandonan a manda Betico sinta na mesa sin por move.

"Na e momento ey mi a puntra: Pero Betico, kico ta e motibo cu nos ta pasa den tur e cosnan aki?

Betico a contesta: "Papá, hopi sacrificio nos tin di pasa aden pa un dia nos por logra Status Aparte pa Aruba.

'Despues, na 1983, na veldt di Winston, ora cu nan a tira Betico pa un tiro mortal lo por a elimina su bida pa asina por stroba realizacion di Status Aparte, pero danki Dios cu papa Dios a bolbe Betico na nos. Tanto el a traha y tog no por a mira realizacion di Status Aparte debi na e terrible accidente bispo di aña nobo di Status Aparte.



E mayornan di Rudy Croes, Don Francisco Croes y Doña Mimita Croes, dilanti di e potret di e desaparecido lider politico Arubiano: Betico.

"Awor Rudy, nos yiu, ta bay drenta politica. Pero nos no por stop e tampoco, pasobra e ta un homber casa, ariba su mes

cu 42 aña di edad. Quizas e ta mira cu e trabao di su ruman, Betico, no a wordu termina. Cu bon
Sigui lesa pag. 6

Cambio den forma di pago a trece problema

Hopi pensionado no por a cobra diavierna

ORANJESTAD(AAN)— Un grupo di pensionado di Gobierno, cu kier a cobra nan pago Diavierna, no a ricibi nan placa, ya cu nan a worde informa na Banco cu no tin placa pa nan. Mientrastanto e cambio di pago no a cay na agrado di mayoria di pensionadonan.

Manera DIARIO a presenta basta tempo pasa, a worde dicidi pa cambia e sistema di pago na pensionadonan di Gobierno. Antes nan tabata cobra na Ontvanger, pero awor a introduci un areglo nobo, cu ta haci cu e pensionadonan mester habri un cuenta bancario y ta ariba

e cuenta aki ta deposita e suma mensual.

E areglo aki a sigui causa disgusto den seno di e pensionadonan. Na promer lugar a worde muestra cu awor forzosamente nan mester habri un cuenta y tene e cuenta habri. Esey kier meen cu tin un suma minimo cu nan mester laga ariba e cuenta y di cual nan no por haci uso.

Tambe nan ta haya cu esaki ta trece cune gasto ya cu cada transaccion na banco ta gasto y den e caso aki e cuantanan ta na number di e pensionadonan.

E problema peor a surgi ora Diavierna a resulta

cu cierto personanan no por a bay cobra. DIARIO a atende e asunto cu Pensionfondsen, cu a duna di conoce, cu e problema a surgi pa motibo cu tabata tin algun persona cu no a duna di conoce na tempo na cual banco nan kier a cobra.

Esnan cu a haya nan mes den problema por drenta den contacto cu e oficinanan na Paardenbaaistraat pa regla e problema.

A worde refuta cu placa a caba y pesey no por a paga e pensionadonan.

Segun calculacion alrededor di 50 di e mas di 400 pensionadonan no por a obra fin di siman pasa.

Mas di 300 persona sin permiso na Aruba

ORANJESTAD(AAN)— Durante razzia, Polis a descubri 100 persona cu ta kedando ilegalmente na Aruba. Pero segun fuentenan por tene cuenta cu lo tin mas di 300 persona cu ta permanece na forma ilegal na Aruba.

Durante algun tempo Cuerpo di Polis a tene razzia na Aruba y nan a descubri alrededor di 100 persona cu tabata keda na forma ilegal na Aruba.

Fuentenan digno di credito a bisa DIARIO, cu mester tene cuenta cu lo por tin mas di 100 persona cu na forma ilegal ta keda na Aruba. Ta worde sospecha cu Diez por ciento di e total aki ta homber, mientras cu e resto ta muher.

Den curso di siman pasa lo a nombra un Jefe

nobo pa Inmigracion y e lo mester bay enfrente e situacion. Posiblemente lo mester introduci un sistema computeriza pa registra entrada y salida na Aruba y asina efectua un mihor control.

Tin hopi caso di persona cu na momento cu nan yega Aruba ta duna un direccion robez intencionalmente na autoridad. Ora bay busca nan, ta resulta cu nan ta keda na otro lugar.

Un problema ta, cu Aruba no conoce e sistema di cedula, cu por yuda tene registro di kende ta posee permiso pa keda na Aruba o no.

Aparentemente un persona ta encarga actualmente cu e control, cu bao e actual circunstancianan ta keda dificil.